

Apeqquteqaat aallaavigalugu oqallisissatut siunnersuut, suliniutit suut suliniutigisinnaanerigut angajoqqaajunerup akisussaaffiullu pitsaanerulersinnissaanut aqqutissiuussisinnaaneq angajoqqaat amerlanerit namminneq meeqqaminnut isumaginnissinnaanerisa qaffassarnissaanut taamaaliornikkullu angerlarsimaffiup avataanut inissiinerit ikilisarlugit

(Inatsisartunut ilaasortaq, Nivi Olsen, Demokraatit)

Akissuteqaat

(Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Inatsisartunut ilaasortaq Nivi Olsen (Demokraatit) inissiisarnerit ikilisinniarlugit angajoqqaajussuseq akisussaaffiullu pillugit pitsaanagerusumik siunnersuisarnissaq qulakkeerniarlugu sorlernik suliniuteqarnissaq pillugu pingaarutilittut oqaluuserisassatut siunnersuuteqarnera qutsavigaarput.

Ilaqutariinnik siusinnerpaamik sullissinikkut Naalakkersuisut atugarliorneq sumiginnaasarnerlu pinaveersaartinniarlugu suliaqarput. Suliaq tamanna iliuusissani suliniutinilu assigiinngitsorpasuaru takuneqarsinnaavoq.

Iliuussissatut pilersaarummi *Pitsaaliuineq pitsaanagerusoq, inissiinerit ikinnerusut* meeqqat toqqissisimanartumi angerlarsimaffimmi peroriartornissaat qulakkeerneqarnissaa siunertaavoq. Taamaaliortoqassappat ilaqutariit attaveqaataat isumalluutaallu pitsaaliuinermit atorineqartariaqarput, aamma kommunit pitsaaliuinermit eqqortumik iliuuseqartariaqarput.

Taamaattumik iliuusissatut pilersaarummi Namminersorlutik Oqartussat, Avannaata Kommuniata aamma Kommune Kujalliap akornanni suleqatigiinnerat pingaarnertut tunngaviuvoq. Ilaqutariinnut ullumikkut pitsaaliuinermit suliniutit ilaat pioreersut, assersuutigalugu Siusissukkut Iliuuseqarneq, Ilaqutariinnik siunersioqateqartarneq aamma MANU, kiisalu suliniutit nutaat suleqatigiinnermit aallaavigineqassapput 2025-milu aallartinneqassallutik. Ilaqutariit siusissukkut Iliuuseqarfigineqartarnissaat, najukkani isumalluutinik atuisarnissaq sapinngisamillu piffissami sivisuumi inissiisarnerit pinaveersaartinnissaat angerlartitsinissarlutik siunertarineqassapput.

Naalakkersuisut iliuusissatut pilersaarummi ‘Pitsaaliuineq pitsaanagerusoq, inissiinerit ikinnerusut’ suliniutaannut qitiusumik tunngaviit ilaagaat ilaqutariinnik tapersersuineq siunnersuinerlu kiisalu meeqqat angerlarsimaffiup avataanut inissinneqarnissaat pinngitsoortinniarlugu angajoqqaatut pisussaaffeqarnissaannik ikiuneq.

Angajoqqaatut pisussaaneq pillugu siunnersuineq ullumikkut ilaatigut suliniutinik ilaqarpoq: MANU, MANU+, Siusissukkut Iliuuseqarneq aamma Ilaqutariit aqqutissioqatigiinnerat.

Tamatuma saniatigut ilinniartinneqartarnerup ataavartumillu nalilersuisarnerup aqqissorneqartarnerini suliaqarfiit assigiinngitsut suleqatigiinnerat tapersersorneqarpoq. Pilersaarusiomermit ilaqutariinnilu aqqutissioqatigiinnerup piviusunnngortinneqarnissaanut piareersarnermit perorsaasuniit, ilinniartitsisuniit, ilaqutariinnut sullissivimmi sulisuniit, sullissisuniit, MISI-mi sulisuniit il. il. suliamut isiginnittariaasaannik ilanngussinikkut meeqqat,

inuusuttut taakkualu ilaquataat atugarliortut pisariaqartitaannik pitsaanerpaamik naapertuutsisisussamik tamakkiisumik isiginnittumik sullissinissaq qulakkeerneqassaaq.

Suliat suliarineqartarnerat oqilisarniarlugu suliassaqarfiillu assigiinngitsut suleqatigiinnerat nukittorsarniarlugu sulisuniit pisariaqartitat naapertorlugit Siusissukkut Iliuuseqarneq pillugu najoqqutassiamik Isumaginninnermut Aqutsisoqarfik aamma saqqummersitsisimavoq.

Taamatutaaq angajoqqaat annerusumik suleqatigiittarnissaat sulissutigineqarsimavoq, tassani suli atualinngitsut pillugit siunnersortit ulluunerani neqeroorutini angajoqqaanik annerusumik suleqateqartarnissaq ukkatarimmassuk meeqqanillu atugarliorsinnaasunik siusissukkut paasisaqartarnissaq immikkut ukkatarimmassuk.

Siusissukkut iliuseqarneq pitsaanerulersinniarlugu suliniutinik tullinnguuttunik ineriartortitsinissamut piviusunngortitsinissamullu aningaasanik suli pisariaqartitsiffiuvoq: angajoqqaanut sanngiitsumik inissisimasunut siunnersuineq, angerlarsimaffiup avataanut inissiisarnerit pinaveersaartinniarlugit ilaqutariinnut ilitsersuineq kiisalu suliniutit kommunit sulisussarsiortarnerannut ilungersuutaannut sulisussaaleqinerannullu tunngassutillit.

Naggasiullugu meeqqanut ilaqutariinnullu sullissiviit, ilaqutariit illui qimarnguiillu pillugit nalunaarut nutaaq ulloq 1. februar 2024 atuutilerpoq. Meeqqanut ilaqutariinnullu sullissiviit kiisalu ilaqutariit illui meeqqanut, inuusuttunut ilaqutariinnullu, tassunga ilanngullugit ilaqutariinngulersut, meeqqat inuusuttullu inuttut atugarliortut imaluunniit immikkut ittunik pisariaqartitaqartut immikkut qitiutillugit suliaqarfiit assigiinngitsut akornatigut siunnersuisassasut, ilitsersuillutillu katsorsaasassasut nalunaarut aalajangersaavoq.

Naalakkersuisuniit taamatut oqaaseqarluta una qulequtaq pingaarutilik pillugu pitsaasumik oqallittoqarnissaa qilanaaraarput.